



ADRESA: Alipašina 14/L, 71 000 Sarajevo
Vakufska banka DD Sarajevo: 1602000023176039; ID BROJ: 4201099390000
TEL/FAX: (+387) 033/206-736; (+387) 061/348-082 - E-mail: karatefederacijebih@gmail.com

K O D E K S
PONAŠANJA TRENERA
U
KARATE SAVEZU FEDERACIJE BOSNE I HERCEGOVINE



Sarajevo: Juli 2018. godine

U skladu sa članom 20. stav (1) tačke 11) Statuta Karate saveza Federacije Bosne i Hercegovine od 13.07.2018. godine Upravni odbor Karate saveza Federacije Bosne i Hercegovine je na svojoj 5 redovnoj sjednici održanoj u Sarajevu dana 13.07.2018. godine usvojio:

K O D E K S

PONAŠANJA TRENERA

U

KARATE SAVEZU FEDERACIJE BOSNE I HERCEGOVINE

Član 1.

Trener obavlja svoje dužnosti u skladu sa Normativnim aktima Karate saveza Federacije Bosne i Hercegovine (u daljem tekstu "KS FBiH"), te Kodeksom kluba. Svojim ponašanjem i postupcima trener brine o statusu i ugledu sporta, a naročito o autoritetu profesije u kojoj djeluje.

Član 2.

U obavljanju svog posla trener će nastojati da znanjem, zalaganjem i ponašanjem stekne povjerenje i ugled kod svojih sportista, roditelja, kao i uže i šire društvene sredine.

Član 3.

Trener stalno vodi računa o ličnom stručnom usavršavanju, koristeći dostignuća nauke o sportu, svoja iskustva i iskustva drugih.

Član 4.

Trener preuzima sve obaveze i zadatke u oblasti stručnog usavršavanja koje su u nadležnosti Stručnog savjeta saveza, a koje proizilaze iz poziva (savjetovanja, kursevi, konsultacije i sl.).

Član 5.

Trener je dužan da svojim ponašanjem služi kao primjer humanosti, istinoljubivosti, dostojanstvenosti i kulturnog ophođenja.

Član 6.

Svojim radom i iskustvom trener je dužan da pomaže dalje razvijanje sporta, te da rezultate do kojih dolazi učini pristupačnim ostalim trenerima i sportskim pedagozima uopšte.

Član 7.

Trener provjerava i vrednuje dostignuća teorije i prakse sportskog treninga i sa novim činjenicama unosi korekcije ili bitne izmjene u to područje.

Član 8.

Kao vaspitač, trener pokazuje besprekorno moralno i društveno ponašanje, kako na poslu, tako i u svakodnevnom životu.

Član 9.

Kao učitelj i vaspitač, trener nema zadatak samo da kod sportista diže nivo takmičarskih sposobnosti, već i da primjenom odgovarajućih sredstava i zahtjeva u trenažnom procesu omogući pozitivnu transformaciju sportiste u svim dimenzijama njegve ličnosti. Sportista je uvek samo subjekt vaspitanja.

Član 10.

Dužnost je trenera da koristi rezultate i iskustva drugih sportova, graničnih i srodnih naučnih disciplina, kao i da svojim radom i nastupima omogući sebi i drugima djelotvorno funkcionalno povezivanje.

Član 11.

Profesionalna i stručna etika zahtijeva od trenera apsolutno pošten stav u interpretaciji ličnih rezultata. Treneru je strano svako prilagođavanje činjenica nečinjeničnom zahtjevu i očekivanju. Trener ne krije i ne mijenja rezultate do kojih je sam došao ili posredstvom iskustva drugih.

Član 12.

Treneri u svom radu primenjuju metode, tehnike i instrumente dijagnostike, koje su prisutne u praksi savremenog treninga.

Član 13.

U privatnim i službenim okolnostima trener ne iznosi neistinito svoje obrazovanje, stručne kvalifikacije i radno iskustvo. Isto tako trener ne predstavlja na netačan ili kompromitujući način Klub, Savez ili ustanovu gdje radi. On je dužan da ispravi, demantuje eventualno netačne navode koji su se pojavili u vezi sa njim, Klubom, Savezom ili Ustanovom.

Član 14.

Nedopušten je bilo kakav odnos između trenera i sportista, izuzev odnosa koji su u skladu sa moralnim odredbama našeg društva i odnosa sportskog pedagoga prema vaspitanicima. Protivno je ugledu trenera bilo kakvo moralno ili materijalno iskorišćavanje sportista, njihovih roditelja ili staratelja.

Član 15.

U skladu sa čuvanjem ugleda poziva sportskog pedagoga, trener ne prihvata nikakva priznanja i materijalna davanja ukoliko ona nisu vezana isključivo za rezultate rada i zasluge u radu.

Član 16.

Trener sebi ne pripisuje dostignuća koja nije ostvario i nije učestvovao u njima. Svoj dio u dostignućima uvijek iskazuje samo sa svojom stvarnom ulogom.

Član 17.

Trener je dužan da čuva poslovne tajne i poslovnu diskreciju. Svi podaci o sportistima koji im mogu nanijeti bilo kakve neugodnosti ili štetu, profesionalna su tajna trenera i ne smiju se objavljivati ili saopštavati izuzev kada postoji prava potreba.

Član 18.

Trener ne preduzima eksperimente koji mogu štetiti sportistima njegove ekipe. Za svaki i najmanji rizik u tom pogledu potrebna je saglasnost sportiste (ako je punoljetan) ili roditelja ukoliko je sportista maloljetan.

Član 19.

Dozvoljena farmakološka sredstva trener nikada sportistima ne prepisuje sam, već u saradnji sa kompetentnim stručnjacima u ovoj oblasti.

Član 20.

Trener je u svom stručno-pedagoškom radu nezavisan. Ocjenu trenerskog rada daje Stručni organ kluba ili stručne institucije Saveza.

Član 21.

Trener zna da poštovanje i ugled duguje svom pozivu i da ga to obavezuje na prijateljski način ophođenja prema drugim trenerima i sportskim pedagogima uopšte, što podrazumijeva i korektnu profesionalnu solidarnost. Čast je i dužnost trenera da sarađuje i pruža pomoć kolegama.

Član 22.

Trener na izuzetno taktičan način i uz maksimalno ispoljenu objektivnost ulazi u eventualne konflikte u kojima se obziri lične prirode surotstavljaju sportskoj ili profesionalnoj etici.

Član 23.

Trener u svojoj životnoj i radnoj sredini propagira sport i sve vrijednosti koje iz toga proizilaze. Svojom aktivnošću on daje podršku i doprinos razvoju KS FBiH i sporta uopšte.

Član 24.

Trener obavlja javnu djelatnost, pa ga to obavezuje da vodi računa o svom zdravlju, izgledu i odijevanju.

Član 25.

U slučaju da osnovna načela i pedagoška etika dođu u sukob sa sredinom u kojoj radi i djeluje trener, on je dužan da se bori za dosljednu realizaciju tih načela. U tim nastojanjima on može i treba da zatraži podršku KS FBiH.

Član 26.

Posebna odgovornost trenera u klubu je briga za organizovan, stručan i kontinuiran rad sa mlađim kategorijama.

Član 27.

Kritička ocjena rada i djelatnosti trener-kolega ne smije da ima devalvirajući i ponižavajući karakter ili osobenosti ličnog obračuna.

Član 28.

Za kršenje normi ponašanja ovog Kodeksa, treneri za svoj rad odgovaraju Stručnom savjetu KS FBiH, odnosno Sudu časti trenerske organizacije. Za teže prekršaje odgovaraće shodno odredbama Disciplinskog pravilnika KS FBiH. Pokretanje postupka može pokrenuti Trener, Klub, Savez, Komisija ili druga lica.

Član 29.

Stupanjem na snagu ovog kodeksa prestaju važiti odredbe prethodnog kodeksa.

Ovaj kodeks stupa na snagu danom njegovog usvajanja od strane Upravnog odbora Saveza.

Broj: UO-5-P4/18

Sarajevo, 13.07.2018. godine

PREDSJEDNIK
UPRAVNOG ODBORA KS FBiH

Mirsad Fezić